

公途養他民子必令恩威兼備平斷四方直道至公無損多益當受此經及帶八字真文無不稱遂

北帝曰下元生人若求仙學道訪友尋真燒丹煉藥隱跡山林必須受此經思此妙道帶此八字若無斯文徒費功力

北帝曰下元生人乃至真人受佩吾此真道必欲行法之時預先盥漱叩齒三通閉炁三息方可下筆書之亦當思神念咒度香喫水當應神驗矣

醮祭真君法

太微帝君爾時居玄景宮中九龍之室自然湧出七寶宮殿其座皆是水晶碧玉琉璃真珠嚴淨裝飾世之稀有座下侍從無鞅之衆各捧香花持心供養十有來者各詣

帝前聽說妙義於是

帝君微笑告曰衆曰下元生人從茲向去各被迷亂鬼精流行善惡莫分不可勝計汝等求學之衆鍊骨修真苦事已度人救危解厄當清淨齋戒存想北帝真君靈妙義救

拔天人令將來之代普得平安見世災危漸得消止如是之福不可思議

北帝曰下元生人作法之日常以亥子二時禮醮七星真君乃施禹步握劍向北熏香志心精潔不可輕慢醮祭得功千日之後其神親見或作美貌女人形或作乞人形若當見時不得與語但低頭禮拜陳心中之願神降良久即寂然而去志心禮送乃取座中湯酒喫之於益之後神氣入心自然有天生之智知未來之事或知軍兵進退家國修延自得

日月灌心身生水火或作老人形或作少年形入夢來告吉凶若人遇惡星交會之時所求不遂官祿不遷常多疾厄心神不安或多怪夢或被惡人咒詛家國不寧但修此法一切災惡不能侵害延年益壽永保於世

北帝曰下元生人若國土不安四方擾動軍賊流行虎狼毒死萬人之厄但依醮禮七星真君不過二日七日惡跡退散兵戈止息

北帝曰下元真子祭醮七星修真求仙延命

扶危須候良日龍行三日馬住五日雉飛七日戊建九日醮祭北司

真君下降獲福萬倍能令人名入清宮壽筭延益

北帝曰臨祭之時具陳白素某國小兆臣某謹上啓

太上元皇九天丈人仙都僕射九天使者左右青龍白虎都監使者垂恩照證小兆設玄科之日奉受神氣謹請

東方青帝駕青龍 南方赤帝駕赤龍 西方白帝駕白龍 北方黑帝駕黑龍

中央黃帝駕黃龍各請詣玄壇證臣所啓皆得成就心中了然求道得道求仙得仙返老却少與道合同

北帝曰作禮以拾香椿願叩頭陳科而上白言小兆今日奉請靈官乞降大慈之澤謹請

東方青真氣入吾身中謹請 南方赤真氣入吾身中謹請 西方白真氣入吾身中謹請 北方黑真氣入吾身中謹請

中央黃真氣入吾身中謹請

五方龍王五色真氣入吾身中小兆今請斗

中真氣散行神仙之術乞天丁力士誅斬邪

精九天丈人收攝災氣陳啓之後得神通力

見自然之智上遊帝闕昇入福堂九蟲不生

三屍殄絕精誠至道感達無爲

北帝曰仁屬木其色青以掃不祥義屬金其

色白能伐百精禮屬火其色赤以除萬殃智

屬水其色黑漂流故氣信屬土其色黃下扶

萬象收捕死亡告諸將來真子有知五行敬

存五星災不能加復能精修本屬之星知其

名號臨絕呼之亦可延年

元生在子屬第一魁星主天英陽明名貪狼

真名格字露神子

元生在丑亥屬第二魁星主天內陰精名巨

門真名正字貞文子

元生在寅戌屬第三魁星主天衝真人名祿

存真名機字衛府子

元生在卯酉屬第四魁星主天輔玄冥名文

曲真名光字子惠子

元生在辰申屬第五魁星主天輪丹元名廉

真真名橫字子衡子

元生在巳未屬第六魁星主天心北極名武

曲真名衛字大車子

元生在午屬第七魁星主天柱天關名破軍

真名行字太賓子

北帝曰河圖寶篆獨標真君之號可傳大力

上合天神若下元行屍之輩敬而祕之自獲

真道

北帝告妙行真人曰夫神至尊者天也配統

於人倫者北斗也故北斗為天曹凡求仙學

道和天安地求顯管運婚姻諸等皆由北斗

之力也乃至世間一飲一饌皆由北斗奏過

然可遇之若欲辟除禍去非屍之鬼莫非

祭七祖為嘉焉常以本氣日六合日戌亥二

時於清潔之所掃地祭天隨國所供白素曰

國號小兆上啓

上天神后北極靈君北斗真人小兆輒依祕

典謹薦神明之果乞萬願歸身主筭之君添

祿之君進福神仙度世真人名入清宮國界

安寧四方平泰五穀豐登二景長輝專誠作

禮

北帝曰常修七星秘典每存北斗呪曰

我是天目與天相逐睛如雷電光耀八極

微見表裏無物不伏急急如律令

北帝曰念神呪了即存北斗覆小兆頭上以

柄指前次存

北帝臨目叩齒二十四通微音呪曰

太乙鎮生三氣合真胎元上景父玄母元

生我五臟攝我精神下灌玉液上朝泥丸

夕召七魄朝呼三魂右命玉華左嘯金神

令我升仙役靈使神常保利貞飛行十天

急急如律令

北帝曰呪訖即存吾在鬱都殿上即念天蓬

神呪每句一叩齒則萬災不干功成道備駕

景登天若下元真子修之為護世之法所施

救拔鬼化為血神呪廣濟無不感應

天蓬天蓬九功煞童五丁都司高刁北玄

七政八靈太上皓兇長顧巨獸手執帝鐘

素臬三神嚴駕夔龍威劍神王斬邪滅蹤

紫氣乘天丹霞赫衝吞魔食鬼橫身飲風  
蒼舌綠齒四目老翁天丁力士威南禦凶  
天騶激於威北銜鋒三十萬兵衛我九重  
辟屍千里祛却不祥敢有小鬼欲來見狀  
鑿天大斧斬鬼五形炎帝裂血北帝燃骨  
四明破骸衆七天獸滅類神刀一下萬鬼自潰  
急急如律令

北帝曰下元生人若精持吾咒者每日丑時  
叩齒三十六通向壬方正坐存神咒曰

左青龍名孟章甲寅右白虎名監兵甲申  
頭上朱雀陵光甲午足下玄武執明甲子  
脾為季子入中官甲辰甲戌急急如律令  
次存北斗咒曰

我是天目與天相逐睛如雷電光耀八極  
徹見表裏無物不伏急急如律令

北帝爾時善巧方便演此經訣諸天衆聖皆  
大歡喜而說偈曰

妙哉北帝君能開護國經若能行妙典大  
地溥光明救拔將來世是為種福田接引  
下元子禍滅即成真仙官無數億乘虛駕

六麟能滅九醜類蕩絕百邪身護國安民  
主扶危外境實下邪不敢動上界勸微塵  
溫邪入清正功成日漸新自然通大聖昇  
降入無形

北帝曰此經聖力神用朗然上統六宮下權  
九地無神不伏無鬼不依勤行敬念真道衆七  
巍

北帝曰此文與神咒道同一源列宿分魁各  
歸明旨此經十卷廣救天人作大地紀綱為  
國土和靜若有善信學士大化真賢傳吾此  
法可清齋七日去穢靜神禮請

北帝時不暫替乞降靈應入夢示人可否方  
任修行不得曲相授度慎之慎之

北帝曰下元生人欲傳此法先得靈應可以  
亥子之時寅卯之日建壬之辰支子和合先

立七元之壇依儀行道入淨戶發爐願念上  
香入詞拜表設醮先度神兵然後分約命信  
碧繒四十九尺五方綵各五尺白素四十尺  
刀一張淨席一領米一石二斗青布緋紋一  
丈六尺青絲一丈二尺百藥湯五斗之具一

一依科然後傳授不得輕泄其經文神咒躬  
自宜讀不得隱昧又須三師證明錄其實約  
玄科立信不泄下愚勿傳非人

北帝曰下元生人貪進志退意在法流心不  
專想不味鍊骨修真吐咽靈液存想六度是

以上仙未應地祇未申功果不圓修行難滿  
今故指告汝等但以虛心虔啟旦夕誦持直  
日仙官即為注上生籍身飛太極與道合同  
北帝曰下元生人若受道威儀不備信命不  
方醮祭不申四曹不錄

北帝曰傳咒授經一一較定勿令錯誤符印  
文字須曉來由若有參差法令不度

北帝曰下元生人有災之日單受五靈大咒  
及辟屍大籙以消百邪不必一一受經

北帝曰下元生人若受經咒畢時醮禮不得  
有怠衆七

北帝曰下元生人若受道法學此經各座供  
養何以故大力神王名字在彼  
北帝曰下元生人受吾經咒祕而隱之不得  
勸導愚輩私相傳授神兵責人

北帝曰下元生人受吾此道念吾神呪不得背子向午爾時座中大衆聞說傳度之法各各按經奉行

太上始天尊說北帝伏魔神呪妙經卷第九

太上始天尊說北帝伏魔神呪妙經卷第十

神兵護國品

北方黑帝玄德天君爾時在淵泉世界有冷國土玉壘山中神丘之上定水池邊菱鞋樹下與諸眷屬侍座童子玄冥真人如斯集會無鞅數衆一日三時願念燒香散花然燈虔仰修齋讚歎自然供養隨所自通應心具足如是精進十有餘載功業未圓誓願不退開救護之秘訣演醮謝之玄科安國寧家濟度幽顯告諸將來真子依法修行自獲真道

北帝曰作吾受法皆須醮祭酈都大吏一切靈官以効功賞當立七元壇燃燈拾香異湯五果隨國供養以銀錢淨水令得豐足入壇啓事祝香勅神上請

三十二天帝君十極真人仙官玉女三界丈人十天大威力魔王八景大神三十六洞天君飛龍騎吏妙行真人三天丈人十極真仙騎吏素車白馬真君三清至真陰景飛雷電吏天丁力士三氣大將軍高麾五湖大將軍

豁落北斗七元大將軍衛靈大神巨獸毒龍騎吏北方大力飛天鬼衆三五大將軍三師門下吏兵天蓬殺童飛天鈎索騎吏太上真神天丁力士天駟甲卒南斗殺鬼使者北斗炎爐科車神吏曠野大神八景神王五嶽四瀆溪澗大神土地主者青腰玉女太和玉女各領部落百萬衆降臨壇所排班列位受令供養

北帝曰北極世界五氣玄天洞陰朔單鬱絕之國太陰五氣五靈玄老黑帝靈君助治玄滋天君太上靈君侍真行氣降生太玄夜光玉女北極世界太虛太華海中北豐羅山脚下洞陰境天國主者太陰水帝君助治東斗斗中生氣君西斗斗中生形君南斗斗中司禁君北斗斗中司命君下吏九令主者五嶽府君二十四治陰官二十四治陽官河海掾吏丘陵溪澗主者無鞅數衆六天惡鬼以為侍衛左右列三十六獄七祖九玄孤魂苦奕若弟子醮祭之時召請並來入座  
北帝曰太陰洞外左右三官生死追呼要司